

# Perhambaan Tradisional di Borneo Utara Zaman Kesultanan Sulu & Brunei

Aping Sajok<sup>1</sup>

<sup>1</sup>Fakulti Kemanusiaan, Seni & Warisan, Universiti Malaysia Sabah, Kota Kinabalu, Sabah.

Progres Artikel

Diterima: 25 Ogos 2016

Disemak: 3 Mac 2017

Disemak: 25 Jun 2017

\*Corresponding Author:

Aping Sajok, Fakulti  
Kemanusiaan, Seni & Warisan,  
Universiti Malaysia Sabah,  
88400 Kota Kinabalu, Sabah,  
Malaysia. Email:  
apingsajok@ymail.com

**Abstract:** This study is related to the practice of slavery happened in indigenous communities in North Borneo since under the rule of the Sultanate of Sulu and Brunei. The aim of this study to see how slavery is considered as a unique practice and the slave role in daily life, including the type of slaves and relationship between the slave and their owners. This study will use information about slavery in North Borneo which are available from various sources such as diary, Official records of British North Borneo Chartered Company (BNBCC), Reports, News paper, Microfilm, books and articles. Slavery in North Borneo basically influenced by the role of *datu's* and *pengiran* of the Sulu Sultanate and Brunei which sparked demand for slaves. This causes a form of slavery that occurred in the indigenous tribes such as Suluk, Bajau, Iranun, Dusun and Murut. The practice of slavery grow rapidly along with pirate activities which are intertwined with the slave trading in the Borneo sea. However, before settling by James Brooke in Sarawak and BNBCC in North Borneo, the abolition of slavery activities was implemented.

**Keywords:** Slavery, Sulu, Brunei, Native, History, North Borneo,

**Abstrak:** Kajian ini adalah berkaitan dengan amalan perhambaan yang berlaku dalam masyarakat peribumi di Borneo Utara sejak dibawah pengaruh Kesultanan Sulu dan Brunei. Kajian ini bertujuan untuk melihat bagaimana amalan perhambaan dianggap sebagai sebuah amalan yang unik dan peranan golongan hamba tersebut dalam kehidupan harian termasuklah jenis hamba dan bentuk hubungan di antara hamba itu sendiri dan pemilik hamba. Kajian ini akan menggunakan maklumat mengenai perhambaan di Borneo Utara yang boleh didapati daripada pelbagai sumber seperti catatan diari pegawai British, rekod-rekod Syarikat Berpiagam Borneo Utara British (SBBUB), laporan, akhbar, Mikrofilem, Buku-buku dan Artikel yang telah dihasilkan oleh sarjana awal. Perhambaan di Borneo Utara pada dasarnya banyak dipengaruhi oleh peranan pembesar daripada Kesultanan Sulu dan Brunei yang mencetuskan permintaan terhadap hamba. Hal tersebut menyebabkan wujud perhambaan yang berlaku dalam suku peribumi seperti Suluk, Bajau, Dusun dan Murut. Amalan ini berkembang pesat bersama dengan aktiviti perlanunan yang saling berkait dengan perdagangan hamba di sekitar perairan Borneo. Namun demikian, menjelang pertapakan James Brooke di Sarawak serta SBBUB di Borneo Utara, penghapusan aktiviti perhambaan ini telah dijalankan.

**Kata kunci:** Perhambaan, Sulu, Brunei, Peribumi, Sejarah, Borneo Utara,

## Pengenalan

Amalan perhambaan yang terdapat di Borneo Utara sebenarnya agak berbeza dengan amalan perhambaan yang terdapat di tempat lain. Secara khususnya kegiatan perhambaan yang terdapat di Borneo Utara sebelum dimansuhkan oleh SBBUB dapat dibahagikan kepada dua iaitu, perhambaan di pantai barat dan pantai timur yang mempunyai corak dan amalan berbeza. Kawasan pantai timur Borneo Utara yang meliputi kawasan Teluk

Darvel adalah kawasan yang mana kadar amalan perhambaan sangat tinggi bilangannya. Manakala di kawasan pantai barat pula ia melibatkan tempat tertentu iaitu di sekitar kawasan Tempasuk dan juga Teluk Marudu.

Pada asasnya, amalan perhambaan yang diamalkan di Borneo Utara adalah bertujuan untuk kepentingan diri iaitu dalam bentuk kemegahan kerana memiliki ramai hamba yang dianggap sebagai harta kekayaan dan ketinggian darjat seseorang. Tambahan lagi, kegiatan ekonomi pada masa tersebut yang sangat

sukar untuk dilaksanakan sememangnya memerlukan tenaga kerja yang ramai yakni golongan hamba. Oleh itu, kertas kerja ini akan membincangkan aktiviti perhambaan yang terdapat di Borneo Utara sehingga kedatangan kuasa kolonial yang mengambil langkah untuk menghapuskan amalan tersebut.

## Masyarakat yang Terlibat Dalam Amalan Perhambaan.

### 1. Iranun

Iranun atau dahulunya dikenali sebagai *Illanun* merupakan suku kaum yang terdapat di Borneo pada ketika ini dan penglibatan mereka dalam amalan perhambaan banyak direkodkan khususnya dalam aktiviti penjualan hamba. Iranun merupakan antara komuniti awal yang terlibat dalam aktiviti penjualan hamba di kawasan Teluk Darvel dan juga Teluk Marudu (Aping Sajok, 2016). Penglibatan mereka dalam aktiviti ini sangat sinonim dengan kegiatan perlanunan yang banyak dijalankan oleh orang laut. Golongan yang dianggap sebagai lanun ini telah merompak dan menculik orang asing mahupun tempatan untuk mendapatkan barangan serta menculik anak kapal yang kemudiannya dijadikan hamba untuk mereka ataupun dijual kepada pemilik hamba (James Francis Warren, 1971).

Pada asasnya, orang Iranun ini terlibat dalam kegiatan ekonomi seperti kaum peribumi yang lain. Namun demikian, pengambilan hamba telah menjadi rutin dalam masyarakat mereka termasuklah menjual hamba kepada pembesar Sulu dan tuan hamba yang memerlukan. Hubungan baik mereka dengan golongan *Datu* juga turut menjadi pemangkin kepada penglibatan mereka dalam aktiviti penjualan hamba. Hal ini disebabkan golongan *Datu* ini merupakan antara pembeli ataupun berfungsi sebagai orang tengah yang menguruskan proses jual beli hamba dari Kepulauan Borneo (James Francis Warren, 1971).

Oleh itu, penglibatan orang Iranun dalam aktiviti perdagangan hamba di perairan Borneo dianggap sebagai aktiviti yang menjadi sumber pendapatan mereka (Ranjit Singh, 2011) sesuai dengan harga hamba yang mahal, hal ini akan memberikan keuntungan kepada si penjual. Oleh itu, bagi mendapatkan hamba untuk dijual di pasaran, golongan ini sanggup menjalankan kegiatan merompak dan menculik anak kapal pedagang yang melintasi perairan Borneo pada ketika itu (Ranjit Singh, 2011). Penglibatan orang Iranun dalam aktiviti perdagangan hamba ini telah menjadi cabaran baharu bagi kuasa asing selepas mereka mula campur tangan bagi mendapatkan hak untuk mentadbir Borneo Utara.

### 2. Bajau

Suku yang turut terlibat secara besar-besaran dalam aktiviti perhambaan khususnya dalam perdagangan hamba adalah orang Bajau terutamanya di bahagian pantai timur dan utara Borneo Utara. Orang Bajau merupakan kaum yang dianggap sebagai penguasa laut terutamanya di perairan Borneo. Kegiatan perlanunan yang mereka jalankan amat ditakuti oleh pedagang asing kerana kaum ini dianggap ganas dan mempunyai kemahiran yang tinggi di laut (Ranjit Singh, 2011).

Orang Bajau turut menjalinkan hubungan baik dengan golongan *Datu* daripada Kesultanan Sulu sekaligus berperanan sebagai pembekal hamba untuk pasaran disana. Orang Bajau terlibat dalam kegiatan perlanunan di perairan Borneo bagi mendapatkan barang keperluan serta dengan tujuan untuk menculik anak kapal yang dipaksa menjadi hamba untuk kegunaan mereka ataupun dijual (Yap Beng Liang, 1990). Walaupun pada asasnya orang Bajau hanya terlibat dalam aktiviti mencari hasil laut seperti mutiara, trepang, telur penyu dan menangkap ikan akan tetapi kaum ini juga menjadi agen kepada pembesar Sulu untuk mendapatkan bekalan hamba (Francis James Warren, 1971).

Penglibatan mereka dalam kegiatan perlanunan ini turut ditakuti oleh orang Dusun terutamanya di kawasan Tempasuk. Menurut Yap Beng Liang, orang Dusun pada zaman tradisional terpaksa berpindah dari kawasan pantai ke pedalaman untuk mengelakkan gangguan atau serangan daripada orang Bajau ini (Yap Beng Liang, 1990). Dalam menunjukkan kekuasaan mereka di Tempasuk, orang Dusun juga dikatakan terpaksa membayar cukai sebanyak 10 gantang beras kepada pemimpin Bajau.

### 3. Balangingi

Orang Balangingi juga adalah komuniti yang terlibat dalam kegiatan perhambaan di Borneo Utara sebelum kedatangan pihak penjajah. Golongan ini merupakan pihak yang banyak terlibat dalam kegiatan perlanunan dan rompakan terhadap kapal pedagang yang merentasi perairan Borneo pada ketika itu (Aping Sajok, 2016). Selain daripada aktiviti perlanunan, orang Balangingi turut berperanan sebagai pembekal hamba kepada golongan bangsawan Brunei serta *Datu* daripada Kesultanan Sulu (Tregonning, 1960).

Menurut Siti Aidah Haji Lokin, kaum Balangingi dikatakan berasal daripada Kepulauan Sulu termasuklah Pulau Balanini, Binadan, Tawi-tawi dan Basilan. Hampir setiap tahun, orang Balangingi akan menyerang aktiviti perdagangan orang Brunei serta menangkap orang Brunei dan Borneo Utara untuk dijadikan hamba. Manakala hamba yang mereka tangkap akan dijual semula sebagai hamba abdi kepada Sultan dan Pembesar Brunei itu sendiri (Siti Aidah Hj Lokin, 2007).

Penglibatan mereka dalam aktiviti perlanunan dan penjualan hamba ini dikatakan adalah didorong ataupun diupah oleh pembesar Sulu bagi menimbulkan kekacauan di perairan Borneo untuk mewujudkan suasana yang tidak tenteram. Hal ini mempunyai hubungkait dengan aktiviti perdagangan yang sebelum ini dikuasi oleh masyarakat tempatan tetapi telah bertukar kepada pedagang asing. Oleh itu, orang Balangingi juga dikatakan selalu diupah oleh golongan *Datu* supaya menculik dan merompak pedagang asing yang melalui perairan Borneo (Clifford Sather, 1997).

#### 4. Murut

Kaum Murut juga turut mengamalkan perhambaan, suku ini merupakan antara peribumi Borneo Utara yang dikatakan memiliki hamba iaitu hamba abdi dan hamba berhutang. Walaupun tidak terlibat secara langsung dalam amalan perdagangan hamba, namun mereka tetap mengambil hamba untuk kepentingan sendiri serta membayar hutang. Dalam erti kata yang lain, orang Murut juga sebenarnya terlibat dalam amalan menjual hamba akan tetapi dibezakan dalam aspek kekerapan jika dibandingkan dengan kaum lain yang turut mengamalkan perhambaan domestik (Sherwood G. Lingenfelter, 1990).

Walaupun gelaran untuk hamba (Aping Sajok, 2016) ini agak berbeza namun mereka tetap mempunyai fungsi yang lebih kurang sama. Ia hanya dibezakan dengan cara mereka untuk merdeka yang mana hamba abdi tidak akan merdeka kecuali ia dimerdekakan oleh tuannya, manakala hamba berhutang pula akan menjadi rakyat bebas setelah berjaya melunaskan hutang mereka.

Selain itu, suku Murut, sememangnya telah mempunyai peraturan mereka sendiri yang digunakan dalam sistem perhambaan yang mereka amalkan. Peraturan ini telah menjadi asas kepada pemilik hamba bagi menentukan keputusan tentang sesuatu hal yang mempunyai kaitan dengan hamba yang mereka miliki. Walaupun ia hanya diturunkan dalam bentuk secara lisan, namun ia terbukti tetap berkesan apabila pemilik ataupun golongan hamba itu sendiri tetap menghormati peraturan yang sudah ditetapkan ini (Aping Sajok, 2016).

Selain itu, dalam kalangan kaum Murut Timogun, terdapat tiga jenis hamba yang diamalkan iaitu hamba tawanan perang yang dikenali sebagai 'rakop', hamba jenis 'Ulipon' dan juga hamba berhutang iaitu 'Ulun – ulun'. Setiap jenis hamba yang mereka miliki ini mempunyai cara pemilikan yang berbeza dan mereka juga mempunyai peranan sendiri (Aping Sajok, 2016).

#### 5. Brunei

Orang Brunei telah berhijrah ke Borneo Utara disebabkan keadaan Borneo Utara pada ketika itu yang masih dalam kawasan jajahan Kesultanan Brunei. Pada

asasnya orang Brunei terlibat dalam aktiviti pertanian dan mengumpul hasil hutan (Siti Aidah Hj Lokin, 2007). Namun demikian, seperti yang terdapat pada kaum lain, orang Brunei juga turut terlibat dalam amalan perhambaan. Keadaan ini sebenarnya turut berlaku dalam kalangan golongan bangsawan Brunei yang terlibat dalam amalan pemilikan hamba dan perlanunan (Siti Aidah Hj Lokin, 2007).

Secara umumnya, masyarakat Brunei sendiri turut mengamalkan kegiatan perhambaan terutamanya melibatkan golongan bangsawan. Ini disebabkan persepsi dalam kalangan golongan atasan Brunei yang menyatakan bahawa ukuran kekayaan serta kekuatan seseorang pembesar itu adalah terletak pada jumlah pengikut, keris, meriam dan hamba yang dimiliki. Keadaan itu sendiri membuktikan bahawa masyarakat Brunei turut menjadikan hamba sebagai lambang kepada ketinggian darjat dan kekayaan mereka. (Aping Sajok, 2016).

Kaum Brunei yang menetap di Papar contohnya turut mengamalkan perhambaan yang diperolehi melalui tawanan perang ataupun dengan kaedah menculik dari kawasan pedalaman. Perhambaan dalam kalangan masyarakat Brunei ini dikatakan dimiliki oleh golongan Ampuan (Dayang Junaidah Awang Jambol, 2009). Namun terdapat juga pemilikan hamba oleh golongan Bangsawan terutamanya pemerintah di kawasan jajahan mereka (Aping Sajok, 2016).

### Lokasi Kegiatan Perhambaan

#### 1. Teluk Darvel

Teluk Darvel pada masa kini adalah meliputi kawasan sepanjang pantai timur negeri Sabah yang merangkumi Lahad Datu, Semporna, Tawau dan Kunak. Kawasan ini adalah laluan perdagangan yang sangat penting kepada pedagang asing mahupun pedagang tempatan sendiri. Sebelum kedatangan penjajah asing, Teluk Darvel adalah pusat pelabuhan utama yang terletak di Tungku. Pelabuhan ini berfungsi sebagai pelabuhan entrepot iaitu menjadi pembekal dan menjadi pusat jual beli barangan yang didagangkan (Tregonning, 1960).

Ekoran daripada serangan kapal perang British terhadap beberapa pelabuhan utama yang menjadi pusat urusan penjualan hamba di utara Borneo, Teluk Darvel telah berkembang menjadi perairan utama yang menjadi lokasi untuk mendapatkan hamba. Selepas 1848, pusat perlanunan di pantai barat Borneo Utara telah berpindah ke Tungku yang terletak di pantai timur Borneo Utara dan ia dipelopori oleh kaum Iranun, Balangingi dan Bajau yang datang daripada Kepulauan Sulu (Aping Sajok, 2016). Dalam hal ini, Teluk Darvel bukan sahaja menjadi pusat perdagangan bahkan turut dijadikan sebagai sarang lanun dan lokasi aktiviti rompakan kapal dagang (Jainuddin Malik, 1991).

Selain itu, kegiatan perhambaan ini juga turut tertumpu di bahagian Sandakan hingga ke Kinabatangan. Di Kinabatangan misalnya, suku peribumi yang tinggal di kawasan sepanjang sungai Kinabatangan kerap menjadi sasaran oleh lanun yang bertujuan untuk merompak atau menculik (Aping Sajok, 2016). Malahan hal ini turut menjadi cabaran besar kepada pihak British terutamanya William Pryer ketika menjadi residen di Sandakan.

## 2. Tempasuk, Kota Belud

Tempasuk turut menjadi lokasi aktiviti perhambaan di Borneo Utara pada era tradisional. Bilangan hamba abdi yang terdapat di Tempasuk pada waktu tersebut sangat ramai. Menurut Yap Beng Liang, pada penghujung abad ke-19, nisbah antara orang yang bebas dan hamba abdi adalah 1:3 (Yap Beng Liang, 1990). Ini membuktikan bahawa amalan perhambaan yang terdapat di Tempasuk pada waktu itu adalah dalam keadaan yang kritikal kerana golongan hamba lebih ramai daripada rakyat biasa. Dalam kalangan hamba abdi tersebut, dikatakan bahawa hamba perempuan lebih ramai jika dibandingkan dengan hamba lelaki.

Hamba abdi di Tempasuk terdiri daripada dua jenis iaitu *anak mas* dan hamba abdi biasa. Di Tempasuk, perhambaan yang diamalkan agak berbeza kerana golongan hamba ini dilayan dengan baik dan mereka tinggal bersama dengan Tuan mereka. Mereka juga berkongsi makanan serta turut dibekalkan dengan tembakau, sirih pinang dan barangan lain. Selain itu, hamba di kawasan ini seperti tidak mempunyai beza dengan rakyat biasa kerana mereka turut diberikan pakaian yang sempurna serta dibenarkan membawa senjata (Yap Beng Liang, 1990). Ini membuktikan bahawa hamba di kawasan Tempasuk tidaklah ditindas dengan teruk. Walau bagaimanapun, terdapat kes yang melibatkan golongan hamba dijual oleh tuan mereka dengan sewenang-wenangnya.

Menurut Siti Aidah Haji Lokin, terdapat pelabuhan lanun di Tempasuk dan Pandasan pada tahun 1812 yang mana pelabuhan tersebut dikuasai oleh tiga orang pembesar Sulu yang bernama Datu Akop, Datu Aragut dan Datu Jumarang. Ketiga-tiga mereka ini dibawah perintah pembesar Brunei yang bernama Pangeran Annam. Pelabuhan yang dikuasai oleh lanun ini telah menyebabkan kegiatan perdagangan hamba terus berleluasa dan sukar dikawal kerana pembabitan pembesar itu sendiri (Siti Aidah Hj Lokin, 2007).

## 3. Teluk Marudu

Teluk Marudu juga merupakan pusat perdagangan hamba yang terdapat di Borneo Utara sebelum dihapuskan oleh penjajah asing. Seperti di kawasan pantai timur Borneo Utara, perdagangan hamba yang berlaku di kawasan ini turut ditunjangi oleh golongan

pembesar Sulu yang dikenali sebagai golongan *Sharif* atau *Datu* yang menjadi wakil Kesultanan Sulu di Borneo Utara (Siti Aidah Hj Lokin, 2007). Teluk Marudu juga mempunyai kawasan yang luas dan atas faktor tersebut kegiatan perdagangan hamba di kawasan ini sukar untuk dibendung.

Sebelum Borneo Utara dikuasai secara rasminya oleh SBBUB, Teluk Marudu sudah terkenal sebagai kawasan yang mempunyai aktiviti perdagangan hamba yang pesat di kawasan pantai barat utara. Ini sekaligus telah mendorong pihak British untuk menghantar armada laut mereka dalam membantu menghapuskan aktiviti perlanunan serta perdagangan hamba yang diketuai oleh pembesar Sulu (Bianca Maria Gerlich, 2003). Kawasan Teluk Marudu dikatakan mempunyai aktiviti perdagangan hamba yang dijalankan oleh orang Iranun, Balangingi dan orang Bajau. (Bianca Maria Gerlich, 2003).

## Jenis-jenis Hamba di Borneo Utara

### 1. Hamba ‘*Uluh ulih Pesaka*’

Golongan hamba jenis ini ialah orang yang menjadi hamba melalui perkahwinan disebabkan ibu bapa kepada seseorang adalah hamba. Oleh kerana itu, gelaran hamba tersebut akan diturunkan kepada anak mereka apatah lagi jika keadaan ibu bapa kepada hamba sudah tua ataupun sakit. Secara tidak langsung anak mereka akan dijadikan hamba bagi menggantikan peranan ibu bapanya sebagai hamba kepada tuannya.

Selain itu, jika *anak amas* ini seorang perempuan yang kemudiannya berkahwin dengan lelaki bukan hamba, maka taraf perempuan tersebut akan bertukar kepada orang bebas dan tidak terikat kepada tuannya lagi (Tregonning, 2007). Walau bagaimanapun, hantaran kahwin akan ditambah dua kali ganda lebih daripada kadar biasa, ini bermaksud untuk tujuan melunaskan hutang hamba tersebut yang masih diwarisi daripada ibu bapanya. Namun demikian, jika ibu bapa kepada anak tersebut masih hidup, mereka tetap masih kekal sebagai hamba kecuali anak mereka yang telah berkahwin dengan rakyat bebas (Henry Ling Roth, 1896).

Terdapat beberapa kadar ‘berian’ yang dikenakan untuk hamba akan berkahwin yang melibatkan *anak amas* seperti setengah pikul senjata tembaga yang bernilai \$20 hingga \$25. Manakala nilai sepikul pula hendaklah dibayar oleh pengantin lelaki kepada tuan hamba tersebut. Seterusnya, jika *anak amas* tersebut berkahwin dengan seorang lelaki yang juga hamba, ia tetap akan kekal menjadi *anak amas*. Tetapi kes seumpama ini dikatakan jarang berlaku dalam institusi kekeluargaan hamba kecuali lelaki yang cuba menikahi perempuan tersebut tidak membayar berian yang ditetapkan (Treacher, 1891).

Walau bagaimanapun, W.H Treacher yang turut membuat catatan mengenai hamba yang dikenali sebagai *anak amas* khususnya di kawasan Tempasuk dan kawasan pantai barat Borneo Utara yang agak berbeza dengan pendapat Tregonning. Menurut Treacher, hamba yang dikenali sebagai *anak amas* ini wujud apabila anak seorang hamba itu adalah perempuan yang mana ia tidak boleh dijual oleh tuan kepada hamba tersebut. Ini bermaksud jika anak hamba yang dilahirkan itu adalah perempuan maka ia tetap menjadi hamba kepada tuan ibu bapanya dan tidak boleh dijual oleh tuan hamba tersebut dan ini dipanggil sebagai *anak amas* (Treacher, 1891).

Namun demikian, jika anak hamba itu adalah seorang lelaki, ia bebas untuk memilih sama ada tinggal dengan tuan ibu bapanya ataupun keluar untuk menyara hidupnya sendiri (Treacher, 1891). Namun tuan hamba tersebut boleh memanggil semula anak kepada hambanya jika memerlukan sesuatu perkhidmatan ataupun kerja. Pada asasnya, orang Bajau dikatakan banyak mengamalkan perhambaan seperti ini yang begitu berleluasa khususnya di kawasan pesisiran Kepulauan Borneo. Menurut Yap Beng Liang (1990) ciri-ciri umum yang membezakan hamba *anak amas* dengan jenis hamba yang lain ialah;

- i. Hamba 'anak mas' tidak boleh dijual tanpa persetujuan.
- ii. Tuannya memberikan layanan yang baik.
- iii. Diberikan kebebasan yang besar termasuklah diberikan amanah mengurus perusahaan tuannya.

## 2. Hamba 'Ulu ulih Beli'

Hamba jenis ini adalah golongan hamba yang diperolehi daripada dua cara iaitu dibeli atau ditangkap. Menurut catatan William Preytmann, hamba dalam kategori ini tidak boleh menebus diri sendiri dan hanya dibenarkan untuk bekerja dalam lingkungan yang terhad (Preytmann, 1879). Ini bermaksud hamba seperti ini tidak mempunyai apa-apa hak dalam kehidupannya (Tregonning, 2007). Kehidupan hamba tersebut adalah terletak kepada pemiliknya kerana mereka tidak mempunyai sebarang hak.

Menurut Yap Beng Liang, hamba ini selalunya diperolehi daripada orang lain sama ada ia dibeli atau pun hasil tawanan perang. Mereka akan terikat sepenuhnya dengan peraturan yang telah ditetapkan oleh tuan mereka dan golongan ini akan lebih cenderung menjalankan kerja berat yang nyata amat berbeza jika dibandingkan dengan hamba *anak amas* dan hamba warisan. Ciri-ciri hamba jenis ini adalah seperti berikut (Yap Beng Liang, 1990);

- i. Hamba tawanan atau dibeli.
- ii. Tiada hak dalam kehidupannya.
- iii. Boleh dijual sesuka hati oleh tuan mereka.

## 3. Hamba Berhutang

Menurut Zainal Abidin Abdul Wahid, golongan ini merupakan rakyat biasa yang dijadikan hamba kerana gagal melangsaikan hutang mereka dalam tempoh yang ditetapkan oleh si pemiutang. Kebanyakan mereka dijadikan hamba kerana melakukan kesalahan seperti mencuri yang mana tidak dapat memulangkan barangan yang dicuri ataupun tidak mampu membayar denda yang dikenakan. Oleh itu, si pencuri tersebut serta isteri dan anak mereka terpaksa tinggal bersama dengan pemiutang dalam tempoh yang dipersetujui bersama sehinggalah hutang mereka selesai dibayar (Zainal Abidin Abdul Wahid, 1996). Selepas hutang berjaya dilunaskan, golongan hamba seumpama ini boleh menjadi rakyat biasa dan bebas untuk bekerja dengan sesiapa sahaja (Preytmann, 1879).

Sepanjang tempoh menjadi hamba, mereka akan diarahkan untuk menjalankan kerja seperti bercucuk tanam, mencari hasil hutan dan juga kerja di rumah tuan kepada hamba tersebut. Walau bagaimanapun, golongan hamba yang berhutang ini dibolehkan untuk dijual oleh tuannya. Hasil daripada penjualan hamba ini dikira sebagai bayaran hutang oleh hamba tersebut dan tarafnya sebagai hamba akan tamat apabila hutang itu selesai dibayar. Walaupun hamba berhutang ini akan dibebaskan apabila hutang berjaya dilunaskan, tetapi kadangkala mereka ini akan menjadi hamba pada masa yang lebih lama apabila ditukar milik ataupun dijual oleh tuan mereka kepada pemilik lain (Azmah Abdul Manaf, 2001).

Selain itu, terdapat peraturan yang ditetapkan oleh pemilik hamba yang turut digunakan walaupun jarang dikuatkuasakan oleh pemilik hamba ini. Dalam soal perkahwinan yang melibatkan golongan hamba ini. Hamba lelaki yang ingin berkahwin akan menyediakan hantaran kahwin itu sendiri dan tidak ditanggung oleh pemilik hamba namun demikian pemilik hamba turut menjadi waris kepada harta jika hamba miliknya meninggal dunia. Manakala dalam kes yang melibatkan hamba wanita pula, pemilik hamba akan menerima hantaran kahwin jika hamba miliknya telah berkahwin (Henry Ling Roth, 1896).

Seterusnya, terdapat kes yang melibatkan hamba berhutang ini yang sangat setia kepada tuannya sehingga menjadi hamba kesayangan dan dianggap sebagai abang, kakak, ibu atau bapa. Namun demikian, jika hamba tersebut cuba melarikan diri, tarafnya akan menjadi seperti hamba biasa. Dalam kes ini pula, hamba tidak akan hidup bebas seperti kehidupan sebelumnya kecuali jika telah bersumpah kepada tuannya untuk tidak lari (Treacher, 1891). Manakala hamba yang dimerdekakan tidak boleh dituntut lagi oleh bekas majikannya walau apa cara sekalipun (Treacher, 1891). Ini bermaksud hamba yang telah dimerdekakan akan

menjadi rakyat biasa dan menjalani kehidupan mereka dengan bebas seperti rakyat lain.

Selain itu, terdapat hamba berhutang di kawasan Borneo Utara yang dibenarkan oleh tuan mereka untuk mencari kerja tambahan sendiri selepas melaksanakan kerja kepada pemilik mereka. Dengan jumlah hutang yang sangat besar pada waktu tersebut, sememangnya agak sukar untuk mereka menjelaskan hutang mereka dalam masa yang singkat. Keadaan ini menjadi faktor utama yang menyebabkan mereka sanggup untuk memperhambakan diri kepada si pemiutang (Aping Sajok, 2016). Dalam hal ini, penghutang yang mempunyai nilai hutang dianggarkan mencecah tiga pikul iaitu \$60 hingga \$75 akan dipaksa untuk menjadi hamba. Namun terdapat juga kes dalam hamba berhutang ini sebenarnya adalah penjudi tegar yang menjual diri bagi membayar hutang mereka (Treacher, 1891). Seperti yang berlaku di Tempasuk, orang berhutang yang rela dijadikan hamba selalunya amat sukar untuk bebas kerana mereka akan dikenakan faedah yang tinggi sehingga sukar untuk mereka membayarnya (Yap Beng Liang, 1990).

Hamba berhutang ini dikatakan kerap diamalkan dalam suku kaum Murut di Borneo Utara. Dalam suku kaum Murut, mereka sanggup untuk menjual anak mereka untuk membayar hutang. Secara tidak langsung anak mereka akan menjadi hamba untuk si pemiutang, amalan ini menjadi tradisi masyarakat Murut. Walau bagaimanapun amalan menjual anak untuk membayar hutang ini tidak diamalkan oleh kaum lain seperti Dusun, Bajau dan Iranun (Henry Ling Roth, 1896). Disebabkan hamba diperdagangkan, beberapa kaedah telah digunakan oleh penjual dan pemilik hamba untuk menetapkan harga hamba mengikut kesesuaian.

#### 4. Hamba Warisan

Hamba warisan wujud apabila terdapat hamba yang berkahwin tetapi belum dapat melangsaikan hutang mereka ataupun sudah mempunyai keluarga sebelum menjadi hamba. Oleh itu secara automatik anak isteri hamba yang berhutang akan turut menjadi hamba pada kemudian hari jika masih belum dapat melangsaikan hutang mereka. Dalam kes yang lain, golongan hamba ini berasal daripada keturunan hamba yang tidak dimerdekakan oleh tuan mereka. Oleh itu keturunan mereka ini akan terus menjadi hamba. Hamba jenis ini boleh diperolehi secara jual beli, pemberian dan pertukaran (Zainal Abidin, 1996).

Menurut Zainal Abidin juga, hamba lelaki boleh mendapatkan upah melalui pekerjaan lain. Golongan hamba jenis ini boleh bekerja dengan orang lain dengan syarat mereka harus mempunyai keizinan daripada tuan mereka terlebih dahulu. Hamba ini boleh mengambil upah untuk pelbagai jenis pekerjaan seperti menggali parit, membuat perigi, memanjat buah-buahan dan

sebagainya. Walaupun dianggap sebagai hamba, namun kadangkala hamba ini mempunyai hubungan yang sangat rapat dengan tuannya (Zainal Abidin, 1996).

Selain itu, hamba tawanan juga merupakan hamba yang diperolehi daripada peperangan sesama suku (Abdul Rahman, 2007). Kebanyakan daripada hamba ini wujud akibat peperangan antara suku yang sering berlaku kerana masing-masing mahu mempertahankan kawasan yang mereka duduki. Oleh itu, mereka akan berusaha mendapatkan hamba dengan cara melalui peperangan antara suku yang lain. Hamba tawanan ini selalunya tidak akan dimerdekakan oleh tuan mereka seterusnya menjadi hamba iaitu hamba seumur hidup mereka (Treacher, 1891).

Seterusnya, hamba tawanan ini juga turut diperolehi daripada penculik Sulu dan Iranun yang membekalkan hamba yang diculik daripada pedalaman Borneo Utara untuk didagangkan. Setelah menjadi tawanan kepada penjenayah tersebut mereka akan dibawa ke pelabuhan utama seperti di Teluk Marudu, Tungku dan juga beberapa tempat lain seperti di Tempasuk, Membakut dan Brunei untuk dijual (Aping Sajok, 2016). Walaupun mereka tidak rela untuk menjadi hamba akan tetapi terpaksa untuk menjaga keselamatan diri sendiri. Hal ini menyebabkan hamba kadangkala melarikan diri apabila mendapat peluang berbuat demikian. Sebagai contoh, Pryer pernah mencatatkan bahawa terdapat pemilik hamba yang bernama Tuan Nachib telah melaporkan kepada beliau tentang hamba miliknya yang melarikan diri ke Labuan (Pryer, 1879). Selain itu, terdapat lagi kes hamba melarikan diri daripada tuan mereka dan meminta untuk dibebaskan seperti yang dicatatkan mengenai tiga orang hamba yang melarikan diri di Labuk (Pryer, 1879).

Selain itu, golongan hamba ini juga dijual kepada bangsawan seperti Datu Sulu yang sebenarnya menjadi pelopor utama kepada perdagangan hamba. Sebagai contoh, apabila Datu Sulu ini tidak mempunyai wang, ia hanya perlu mendakwa seorang yang mempunyai anak yang ramai dengan dakwaan yang tidak benar seperti tidak mengikut perintah. Sebagai balasannya, Datu tersebut akan menangkap anak mereka untuk dijadikan tebusan (Jainuddin Malik, 1991). Hal ini selalunya dikaitkan dengan penindasan terhadap golongan rakyat bawahan yang selalu dijadikan sasaran untuk diambil sebagai hamba.

Manakala peluang untuk hamba tawanan ini untuk dibebaskan adalah amat tipis memandangkan keadaan asal usul mereka yang tidak diketahui. Oleh itu, hamba tawanan ini akan cenderung untuk dijadikan hamba abdi iaitu hamba seumur hidup (Junaidi Payne, 1994). Walaupun kehidupan mereka digelar sebagai hamba, akan tetapi terdapat peraturan yang akan membolehkan mereka bebas iaitu melalui perkahwinan. Dalam hal ini, seorang hamba lelaki yang berkahwin

dengan wanita bukan hamba tidak akan bebas, dan anak yang mereka lahirkan akan mewarisi gelaran hamba tersebut. Akan tetapi, seorang wanita hamba yang berkahwin dengan lelaki bebas akan menjadi bebas dan anak yang mereka lahirkan tidak akan mewarisi gelaran hamba mereka (Owen Rutter, 2007).

## **Kepentingan Hamba di Borneo Utara**

### **1. Pengaruh Politik**

Amalan perhambaan sebenarnya dilihat sebagai suatu usaha untuk mewujudkan pengaruh politik dalam kelompok masyarakat yang mengamalkan tradisi ini. Pembesar yang mempunyai ramai hamba akan disanjung tinggi oleh lapisan masyarakat dibawah mereka kerana ia dianggap sebagai lambang kekayaan pembesar tersebut. Manakala, masyarakat bawahan pula amat menghormati pembesar ataupun individu yang mempunyai ramai hamba kerana disifatkan sebagai orang yang berkedudukan (Aping Sajok, 2016).

Masyarakat ini juga menghormati mereka yang mempunyai hamba yang ramai dan pada asasnya akan mempunyai kedudukan yang lebih tinggi dalam hierarki masyarakat (Abdul Rahman Hj Ismail, 2007). Melihat kepada kecenderungan masyarakat untuk menghormati individu yang mempunyai ramai tenaga hamba, maka ia sekaligus mendorong pembesar ini untuk terus mengukuhkan kedudukan mereka dengan terlibat dalam perdagangan hamba yang sangat berleluasa di Borneo sewaktu era sebelum campur tangan kuasa asing (Aping Sajok, 2016).

### **2. Perdagangan**

Sebelum kedatangan kuasa asing di kepulauan Borneo, kerajaan maritim seperti kesultanan Brunei dan Kesultanan Sulu merupakan kuasa dominan yang berlatar belakangkan maritim sebagai tunjang kekuatan ekonomi dan pengaruh politik mereka. Kerajaan ini diperintah oleh kuasa tertinggi seperti sultan dan para pembesarnya manakala di kawasan jajahan seperti Borneo Utara dan Sarawak akan diperintah oleh wakil yang dilantik atau pun pembesar yang dihantar oleh pemerintah sendiri untuk mentadbir kawasan jajahan (Mohammad Raduan Mohd Arif & Amaluddin Bakeri, 2001).

Menurut Mohammad Raduan Mohd. Ariff dan Amaluddin Bakeri, aktiviti pengumpulan hasil laut seperti kulit penyu, sirip ikan jerung, tripang dan mutiara serta hasil hutan yang bernilai seperti rotan, sarang burung, kapur barus serta damar telah dijalankan oleh golongan hamba. Dalam hal ini, hamba akan ditugaskan oleh tuan mereka yang terdiri daripada golongan bangsawan dan aristokrat untuk mencari hasil hutan dan laut untuk kegunaan sebagai barang dagangan.

Oleh itu, hasil daripada usaha oleh golongan hamba seperti mencari hasil hutan dan hasil laut akan

didagangkan oleh pembesar kepada pedagang yang melalui kepulauan Borneo (Mohammad Raduan Mohd Arif & Amaluddin Bakeri, 2001). Hamba menjalankan kerja fizikal dalam bentuk tenaga manusia bagi menyokong dan menjalankan berbagai-bagai kerja yang wujud dalam masyarakat peribumi. Penglibatan dalam aktiviti perdagangan ini dikawal sepenuhnya oleh golongan bangsawan yang bertindak sebagai perantara pedagang dan pembekal (Jainuddin Malik, 1991).

Dalam hal ini, dapat dilihat bahawa golongan hamba telah memainkan peranan yang sangat penting dalam kegiatan ekonomi sesebuah kerajaan. Penglibatan mereka sebagai orang suruhan untuk mencari hasil bumi untuk tujuan perdagangan adalah penting berdasarkan latar belakang golongan ini sendiri yang terdiri daripada golongan penduduk masyarakat kelas bawahan.

Dalam hal ini, kepentingan tenaga kerja manusia amat diperlukan apatah lagi melibatkan kerja yang dijalankan dalam skala yang besar. Penglibatan golongan pemerintah dalam aktiviti ekonomi khususnya dalam kegiatan perdagangan juga turut menjadi faktor yang mengalakkan perhambaan berlaku. Permintaan yang tinggi daripada pedagang asing menyebabkan aktiviti ekonomi seperti mencari sarang burung, rotan, damar dan mutiara memerlukan tenaga kerja yang ramai dan kos yang tinggi. Oleh itu, dengan penglibatan golongan hamba, pembesar atau pedagang tempatan yang terlibat dengan aktiviti perdagangan di Borneo tidak perlu mengeluarkan kos yang tinggi untuk mendapatkan barangan yang mereka perlukan (Baszley Bee Basrah Bee, et al, 2009).

### **3. Ketenteraan**

Selain daripada digunakan untuk tujuan pengaruh politik dan aktiviti perdagangan, golongan hamba juga kerap digunakan untuk menguatkan jentera perang. Pada dasarnya, golongan hamba merupakan pengikut setia kepada tuan mereka tanpa mengira ia berkedudukan tinggi dalam masyarakat atau sebagai seorang pembesar dalam kawasan tersebut. Oleh itu, apabila berlaku peperangan antara suku ataupun dengan kerajaan lain, pembesar lebih cenderung untuk menggunakan hamba sebagai tentera dalam peperangan tersebut (James Francis Warren, 1981).

Dalam hal ini, golongan hamba patuh dan tidak melanggar arahan daripada tuan mereka walaupun berdepan risiko kehilangan nyawa. Tidak hairanlah golongan hamba ini kerap digunakan untuk tujuan peperangan bagi mengekalkan kuasa pembesar di kawasan yang mereka jaga. Selain itu, hamba turut digunakan oleh penjenayah sebagai anggota mereka yang berperanan sebagai pengayuh perahu yang digunakan untuk merompak dan aktiviti perlanungan lain di perairan Borneo (James Francis Warren, 1981).

Hamba yang memiliki peranan sebagai tentera diberikan pakaian yang lebih baik berbanding dengan hamba yang lain. Mereka juga turut dibekalkan senjata seperti keris bagi melindungi tuan mereka terutamanya dalam perjalanan yang jauh. Keadaan ini sebenarnya telah mewujudkan hubungan yang rapat antara tuan dan hamba mereka.

Selain itu, jika kematian penduduk sesebuah kampung melebihi musuhnya, maka pihak musuh tersebut perlu memberikan seorang hamba yang akan diserahkan kepada musuh mereka untuk dibunuh sehingga bilangan mangsa kedua belah pihak menjadi sama. Dalam hal ini, hamba digunakan sebagai korban bagi menggantikan nyawa manusia yang terbunuh dalam peperangan di kampung atau kaum. Ini dikatakan kaedah yang digunakan untuk mencari perdamaian dan menghentikan peperangan antara kampung tersebut (Yap Beng Liang, 1990).

#### 4. Pertanian Tradisional

Fungsi hamba pada zaman tersebut juga sebenarnya digunakan dalam aktiviti pertanian khususnya sektor yang berskala besar serta memerlukan tenaga kerja yang ramai. Pembesar yang menguasai sesebuah kawasan cenderung untuk mengambil hamba yang ramai kerana digunakan untuk mengusahakan tanah milik pembesar ini (Aping Sajok, 2016). Hamba akan diambil untuk mengerjakan tanah untuk pertanian termasuklah sawah padi. Ini sebenarnya memerlukan tenaga kerja yang ramai untuk tujuan memudahkan dan meringankan kerja tersebut. Oleh itu, hamba sangat diperlukan kerana faktor upah yang tidak diperlukan.

Suku kaum yang terlibat dalam aktiviti perhambaan seumpama ini lebih tertumpu kepada kaum peribumi yang lebih cenderung untuk kegiatan ekonomi berasaskan pertanian dan mencari hasil hutan. Namun demikian, hamba yang mereka miliki adalah diperolehi daripada penjual hamba ataupun daripada hamba warisan.

#### Kesimpulan

Keadaan amalan perhambaan di Borneo Utara telah diterima sebagai suatu budaya dalam sesetengah kaum peribumi. Budaya ini dijadikan tradisi oleh golongan yang memerintah sehingga golongan bawahan menganggap ia sebagai sesuatu yang tidak perlu untuk ditentang. Perhambaan daripada kaca mata masyarakat bawahan adalah suatu peranan yang istimewa apatah lagi jika mereka berkhidmat di bawah pemimpin tempatan yang mempunyai kedudukan atau kekayaan yang lebih tinggi berbanding yang lain. Rentetan itu, terdapat hamba yang sengaja menghambakan diri mereka semata-mata untuk mendapatkan kedudukan yang lebih baik.

#### Rujukan

- Abdul Rahman Haji Ismail. (2007). *Malaysia: Sejarah Kenegaraan dan Politik*. Kuala Lumpur: Dewan Bahasa dan Pustaka.
- Aping Sajok. (2016). *Sejarah Amalan Perhambaan di Borneo Utara (1800-1942)*. Tesis Sarjana. Kota Kinabalu: Universiti Malaysia Sabah.
- Azmah Abdul Manaf. (2001). *Sejarah Sosial Masyarakat Malaysia*. Kuala Lumpur: Utusan Publications & Distributors Sdn Bhd.
- Beng Liang, Yap. (1990). *Perubahan Sosial dalam Masyarakat Bajau di Kota Belud Sabah*. Tesis. Kuala Lumpur: Universiti Malaya.
- British North Borneo Herald*. 02 November 1937. Arkib Negeri Sabah.
- Dayang Junaidah Awang Jambol. (2009). *Sejarah Perkembangan Golongan Bangsawan Melayu Brunei di Daerah Papar (1881-1963)*. Tesis. Kota Kinabalu: Universiti Malaysia Sabah
- Diary of Mr. Pretyman W, First Resident of Tempasuk. 19 September 1879. Arkib Negeri Sabah.
- Diary of Pryer W.B. A Trip up The Kinabatangan River. February 1881. Arkib Negeri Sabah.
- Hall, Maxwell. (2007). *Labuan Story: Memoirs of a Small Island near the Coast of North Borneo*. Kuala Lumpur: Chung Nam Printing Publishing.
- Jainuddin Malik. (1991). *Sejarah Orang-orang Bajau Sabah: Abad ke-19*. Tesis. Kuala Lumpur: Jabatan Sejarah Universiti Malaya.
- Jatswan S. Sidhu. (1995). *Sejarah Sosiekonomi Brunei 1906-1959*. Kuala Lumpur: Dewan Bahasa dan Pustaka.
- Leong, Cecelia. (1982). *Sabah The First 100 Years*. Kuala Lumpur: Percetakan Nam Yang.
- Lingenfelter, Sherwood G. (1990). *Social Organization of Sabah Societies*. Kota Kinabalu: Department of Sabah Museum and State Archives.
- Mohd Nor Ghani & Noraini Ismail. (1986). *Borneo Abad Kesembilan Belas*. Kuala Lumpur: Dewan Bahasa dan Pustaka.
- Mohd Sarim Haji Mustajab (ed). (2004). *Warisan Budaya Sabah*. Kota Kinabalu: Universiti Malaysia Sabah.
- Payne, Junaidi. (1994). *This is Borneo*. London: New Holland Ltd.
- Pryer W.B, Sandakan Diary: 29 September 1879-16 December 1880. Arkib Negeri Sabah.



- Ranjit Singh, D.S. (2011). *The Making of Sabah 1865–1941*, Kota Kinabalu: Bahagian Kabinet dan Dasar Jabatan Ketua Menteri.
- Rousseau, Jerome. (1990). *Central Borneo: Ethnic Identity and Social Life in Stratified Society*. New York: Oxford University Press.
- Rutter, Owen. (2008). *British North Borneo; an account of its history, resources, and native tribes*. Kota Kinabalu: Opus Publications.
- Sarita Japin. (1998). *Penentangan Keatas Pentadbiran Syarikat Berpiagam di Sabah 1881–1942: Satu Tinjauan*. Tesis. Kuala Lumpur: Universiti Malaya.
- Sather, Clifford. (1997). *The Bajau Laut: Adaptation, History and Fate a Maritime Fishing Society of South Eastern Sabah*. New York: Oxford University Press.
- Siti Aidah Haji Lokin. (2007). *Perubahan Sosioekonomi dan Pentadbiran Masyarakat Peribumi Sabah (1881-1963)*. Kota Kinabalu: Penerbit UMS.
- Treacher, W.H. (1891). *Sketches of Brunei, Sarawak, Labuan and North Borneo*. Singapore: The Government Printing Department.
- Tregonning, K.G. (2007). *Under Chartered Company Rule (North Borneo 1881- 1946)*. Kuala Lumpur: University of Malaya Press.
- Tregonning, K.G. (1960). The Elimination of Slavery in North Borneo. *North Borneo News & Sabah Times*. 05 October.
- Warren, James Francis. (1971). *The North Borneo Chartered Company's Administration of the Bajau (1878- 1909)*. Athens: Ohio University.
- Warren, James Francis. (1981). *The Sulu Zone 1768-1898*. Singapore: Singapore University Press.
- Wright, L.R. (1970). *The Origin of British Borneo*. Hong Kong: Hong Kong University Press.
- Zainal Abidin Abdul Wahid. (1996). *Malaysia: Warisan dan Pembangunan (Edisi Kedua)*. Selangor: Dewan Bahasa dan Pustaka.